

欽定大清會典事例

欽定大清會典事例卷三百三十八

禮部

貢舉 錄送鄉試二

嘉慶三年覆准本年

臨雍陪祀觀禮各生。有情願留京鄉試者。應俟領照後。准其由監驗明。由廩生增生附生出身者。照正途貢監例錄科。由武生奉祀生俊秀出身者。照俊秀貢監例錄科。至在監讀書及在部候考之各廩生。考到錄科之處。仍照各省貢監鄉試例。查明正途及俊秀出身。分別辦理。○又覆准。八

旗恩廕生。有由官學生出身者。業經吏部給發執照。應與貢監一體鄉試。○五年覆准。凡廕生以旗員用。先在本旗行走者。其未經得缺以前。應照候補人員之例應試。○又覆准。捐納人員。除候補候選者例由吏部咨送外。至未經投文投供之員。吏部無從查覈。自應仍行分別正途俊秀。與未經捐官之貢監。一例辦理。○六年

諭。向來俊秀監生。鄉試錄科。係由國子監考試。因吳省欽條奏。改為欽派大臣在貢院局試。嗣又有御史請復舊例者。經禮部議駁未行。此時貢院正值興修。未

能在彼錄科。此次俊秀監生。仍由國子監考試。不必
欽派大臣。以後或應照舊例。或仍在貢院錄科之處。
著軍機大臣會同禮部議奏。欽此。遵

旨議定。俊秀貢監錄科。本為小試。從前因國子監難於
關防。是以有貢院錄科之例。原屬不得已之變
通。嗣後俊秀貢監。仍令國子監照舊辦理。惟於
錄科後。每次即將原卷封固。並造具籍貫姓名
清冊送部存庫。俟揭曉磨對之日。凡由俊秀中
式者。查出錄科原卷。夾於中式試卷之內。覈其
筆迹文理。有迥不相符者。舉出究辦。○又覆准。

外省駐防生員。願應鄉試者。應由該駐防衙門
咨送回旗。照在京八旗生員鄉試例一體辦理。
○七年

諭前蒙

皇考高宗純皇帝特降諭旨。令軍機大臣會同部旗。將
國初以來殉節諸臣。未經得受世職者。查明賞給恩
騎尉。世襲罔替。仰見

皇考崇獎蓋臣。推恩後嗣。實為

異數。隆施。乾隆六十年。先經軍機大臣等。將在京八旗
從前殉節諸臣。查奏一百四十餘員。補行賞給恩騎

尉世職。茲又據軍機大臣會同兵部。將數年以來。各省陸續咨行從前殉節諸臣九百九十餘員。查明開單具奏。朕詳覈諸臣事蹟。俱能抗節效忠。成仁取義。允宜賞延於世。用示褒嘉。所有單開各該員子孫。均著加恩賞給恩騎尉世襲。因替。惟念該世職等承襲之後。若照例分發各標營學習。其中或有未能諳習弓馬。差防者。轉非成全之意。所有世職人員。著加恩。凡遇承襲時。在各地方具呈分別咨部。除情願入標學習當差者。仍照舊例支給俸餉外。其有願應文試者。即以本職頂戴作為文生員。願應武試者。即以本

職頂戴作為武生。准其一體應試。嗣後各省凡遇應襲恩騎尉世職。著照此例辦理。餘亦俱照所議行。○又覆准。恩騎尉世職人員。准作文生員者。如願應鄉試。比照候補候選人員之例。一體錄科。○八年覆准。補給恩騎尉世職人員。既係殉節各員後嗣。或本係生員兼襲。或情願改為文生員應試。自應與軍營效力

賞給頂戴職銜之生員。一例辦理。其鄉試錄科。照恩騎尉世職生員錄科之例。畫一辦理。○又定。教職降調應補雜職人員。不准應試。○十二年奉

旨。嗣後各項拜唐阿內。有條貢監生員者。均著准其應試。其緣事罰充拜唐阿者。仍不准其應試。著為令。○

又覆准。嗣後凡順天附生捐納候補候選人員。如地方官申送者。仍由學政錄科。由吏部咨送者。准其由國子監錄科。○又覆准。福建臺灣府錄送科舉。應酌定為三百名。此外實有文理清通。可以造就者。准於定額外量為寬送。○十五
年奉

旨。嗣後凡指定額駙者。無論舉貢各項出身。均不必再應鄉會試。著為令。○又議准。嗣後西安駐防生員。赴

京應文鄉試。及繙譯鄉試。酌於四月內考試。馬步箭錄科。應由該將軍酌量程途遠近。覈定起程日期。赴京應考。○十七年奉

旨。嗣後旗人身帶額駙職銜者。俱不准應試。若額駙職銜業經革去。俱仍准其應試。著為令。○十八年

諭。各省駐防官兵子弟。准其於本省就近考試入學。因鄉試必須來京。道途遙遠者。每以艱於資斧。裹足不前。現在駐防旗人。並議准就近應武童試。嗣後各省駐防子弟入學者。即令其於該省一體應文武鄉試。於造就人材之道。較為有益。其如何編號定額取中

之處。著禮兵二部妥議具奏。欽此。遵

旨議准。各直省駐防生員。自二十一年丙子科為始。於本省鄉試編立旗字號另額取中。內有報捐貢監應試者。亦就近一體鄉試。仍由各將軍副都統等考試馬步箭合式者。再行咨送學政錄科。以符定制。○二十一年覆准。童生賞給九品職銜。並非貢監出身。仍未便與生員一體錄送鄉試。○二十二年覆准。嗣後考列五等之廩增附生。均不准其科試錄遺。○又奏准。捐納職官分發省分。因資斧不足。告假回籍措資。本係不准

鄉試之人。違例應試者。如中式。將舉人除名。○
又覆准。揀發指揮。係聽候差遣委用之員。究有
地方職守。與在部候補候選人員不同。應不准
其鄉試。○二十三年覆准。各部院小京官。曾任
實缺。服滿候補者。仍照候補人員例。由本衙門
送監錄科。○二十四年覆准。實缺九品醫士。由
貢監出身者。准其錄科應試。○二十五年議准。
嗣後鄉試之年。如有俊秀貢監。充當順天府屬
幕友。不及回籍起文。欲就近在京應試者。由順
天府造具貢監姓名籍貫三代切實文結。聲明

條何衙門申送緣由。彙齊送監。該監仍取具同考五人互結收錄。如有頂冒等弊。除將本生斥革治罪外。將出結官及互結各生。一併照例議處。其籍隸順天貢監。仍不准取游幕文書應試。○又覆准。生員既授封職。例應開除。不准再應鄉試。○道光元年

諭姚文田奏教官鄉試請仍照例考送一摺。教官願就本省鄉試者。例應與生員一同考送。嗣後無論候補現任。着仍由學政普律考送。以歸畫一。○又覆准。滿洲生員世襲恩騎尉。業於學冊內除名。現在將

軍衙門充當閒職差使。並未補缺。照候補候選人員例。由監錄科應試。○又覆准。各部院小京官緣事革職。旋因查辦廢員奉

旨以京職用者。仍准鄉試。○二年奏准。嗣後由旗改歸民籍之繙譯舉人生員。准其改作文舉人生員。一體應鄉會試。○又覆准。由監生報捐武職虛銜者。如註銷職銜。仍留監生。一體應文闈鄉試。○又覆准。職員捐請本身封典。究與候補候選人員無異。仍應一體應試。○四年

諭。將攸銛奏查明承種蒙古地畝各戶。特符控欠。請酌

定章程以懲刁劣等語。所議甚是。直隸口外承德府並所屬各州縣蒙古地畝。向係外省流民寄居承種。該民人等因年久入籍考試。往往恃符逞強。並有外省外府潛赴口外頂冒應試者。一經獲售。即入籍該處。聯為一氣。以致應納糧租。歷年拖欠。迨地方官訊追。又復任意抗延。不可不嚴行整飭。嗣後凡承種蒙古地畝。如有拖欠糧租。在官告追未結者。本人及子孫不准應試。如係生員舉人。亦不准應鄉會試。均暫行扣除。每屆考試之年。責成各該地方官。豫期詳明順天學政。並直隸總督衙門查覈。其應會試者。亦詳

咨禮部查照。俟糧租完清後。仍准照舊赴考。如有假捏改名頂冒等弊。責成教官隨時查察。據實詳辦。儻教官與廩保生員徇隱不舉。即行照例叅革嚴懲。以除積習而儆刁風。○又覆准。孝廉方正考試。以知縣用者。在部投供候選。照候補候選人員例。由吏部咨送國子監錄科應試。○五年覆准。教官緣事革職。捐復原官候補者。仍應鄉試。○又覆准。漢軍現任教職。仍照八旗人員例。由該旗咨送兵部考驗騎射。再行投卷應試。○六年奏准。俊秀議敘職銜者。准其補捐監生應試。○七年覆

准。已滿吏非現充書吏之人。且取有身家清白
甘結。准其補捐監生。一體應試。○八年奏准。正
途及俊秀貢監出身之京職人員。在部寺學習
行走者。向止在國子監錄科。如有因事故回籍
者。應在籍一體鄉試。仍由地方官查明回籍緣
由。申送學政錄科。至親老終養人員中式後。應
俟終養畢。方准給咨會試。○又覆准。鴻臚寺序
班。由順天生員充補者。仍歸順天學政錄科。轉
送鄉試。○又覆准。滿洲二品廕生。已食武職俸
餉。隨旗當差者。其未經得缺以前。仍准應試。○

又覆准。直隸駐防生員。鄉試時歸入在京滿洲生員未經考列科舉者一體羅試。○十一年

諭。前據御史陳焯奏。陝甘學政違例送考。藩司不行駁回。該撫參奏時意存含混。當降旨令史譜等明白回奏。茲據該撫奏口外士子道里遼遠不能剋期到省。學政戴蘭芬錄送遲延。係照成案辦理。藩司楊名颺不行駁回。亦因有案可憑。實非瞻徇濫收。該撫未將陝西歷科鄉試辦理情形聲明。係屬疏漏等語。史譜戴蘭芬俱著交部察議。楊名颺前已降旨交部察議。毋庸再議。該省口外烏魯木齊及巴里坤等處士子

僻居邊遠。沿途阻滯。自所不免。著自道光十二年為始。嗣後邊遠士子。務先期曉諭。令其趕緊起程。限於八月初一日以前全數到省。不得任意逗遛。逾限即不准收考。○又覆准。拔貢就職。直隸州州判。業已分發到省。係聽候差遣委用之員。與在部候選。並就職捐職。在籍候選者不同。不准告假回籍鄉試。○十四年覆准。雲騎尉世職。改為文生員者。由本省錄科鄉試。其就應順天鄉試之處。並非貢監出身。不准入場。○十五年議准。各省俊秀貢監中式者。該學政將科試及錄科原卷封固。

用印。與中式硃墨卷一同解部。以憑覈對文理筆迹。○十六年

諭嗣後承襲一二三等輕車都尉及騎都尉世職。比照雲騎尉恩騎尉之例。准其以文武生員兼襲。應試支食世職俸銀。該部仍於帶領引見時。將應否兼襲之處。聲明請旨。其捐貢捐監人員。概不准其兼襲。亦不准以本非文武生員。將輕車都尉騎都尉世職。改作生員應試。以示限制。○又

諭給事中成觀宣奏本科順天中式第六名童丙榮。係戶科書吏童翰。改名蒙考。當飭禮部查取童丙榮鄉

試卷。交軍機大臣查對筆迹文理。俱與覆試卷相符。惟未呈明註銷書吏。究有不合。童丙榮著罰停會試一科。○又議准。嗣後順天學政考羅。應按照府分。各歸各屬。酌量人數多寡。分日考試。以憑去取。仍先期出示曉諭。不准隨到隨考。致滋槍替之弊。○又議准。順天等府生員赴羅試者。除現任京官子孫弟姪外。均不准取結赴考。○十九年議准。嗣後各省貢監。無論游幕本省外省。實有不及回籍起文者。照順天鄉試例。由幕所取具印文。開具姓名籍貫三代清冊。加具並無頂名冒

替甘結。申詳督撫。由督撫文送本省應試。其隨
任貢監。如係正印官胞兄弟子姪。准取具本官
印文冊結申送。教官佐貳。由所任地方正印官。
加具印文申送。儻游幕文書。不加督撫印文。隨
任文書。不用正印文結。或非胞兄弟子姪。該學
政查出。將該貢監扣除。並將申送官職名送部
議處。至籍隸省會建設貢院者。該府所屬之貢
監。仍照籍隸順天貢監。不准取具游幕文書之
例辦理。○二十三年

諭。國家分設八旗兵丁駐防各省。立意至為深遠。嗣因

生齒日繁。披甲名糧。例有定額。勢不能概令食糧當
差。而各弁兵子弟。亦有讀書向上。通曉文義者。聽其
應試。以廣進取之階。所以造就人材。體恤旗僕者。無
微不至。但思八旗根本。騎射為先。清語尤其本業。至
兼習漢文。亦取其文藝清通。便於繕譯。乃近年以來。
各駐防弁兵子弟。往往鶩於虛名。浮華相尚。遂至輕
視弓馬。怠荒武備。其於應習之清語。視為無足重輕。
甚至不能曉解。朕閱嘉慶五年

皇考諭旨。各省駐防人等。准於該省考試文生。原係於
伊等格外恩施。若專務此而廢棄清語騎射。即停止

此例。不准考試。亦屬應該。俟清語騎射演習熟練時。方准考試等因。欽此。仰見我

皇考聖意周詳。訓誡諄諄之至意。因思清語騎射。全在該管大臣官員等。平日盡心訓飭操演。而弁兵子弟。亦必令藉此進身。方能益加奮勉。現在武闈鄉試。各省駐防一體與考。應試之人。弓馬如果熟嫻。不患無登進之路。其應文試者。必應改試繙譯。庶不至專習漢文。轉荒本業。除本科各省文鄉試仍照例准其應考外。嗣後各處駐防。俱著改應繙譯考試。俾有志上進者。咸知非熟習清文。不能倖邀拔擢。自必爭相摩

屬。日益精通。其各該將軍副都統等。尤宜隨時訓練。
董勸兼施。毋得視為具文。以副朕崇實黜浮之意。○
又覆准。廩增附青衣生等。如有願棄文就武者。
准其報捐武監應武鄉試。仍於執照內註明不
准再應文闈鄉試字樣。以杜文武跨考之弊。○
又覆准。教官因案降調歸籍候選者。不准鄉試。
○又覆准。難廕生註冊候銓。非監生出身者。一
體准應鄉試。○又覆准。捐納分發人員。並未驗
看領照者。一體鄉試。○二十五年覆准。俊秀議
敘五品以上。及七八品職銜者。補捐監生。改應

鄉試。不得再應童試。○又覆准。嗣後各省俊秀及廩增附報捐貢監者。均依戶部所定期限換照。如近省在一年之內。遠省在十五月之內。尚未換領部照。適逢鄉試。准執持實收考錄科舉。如逾限期。驗明執照。方准收考。不准僅執實收錄科應試。○二十六年覆准。直屬捐輸職員。業經開除學冊之廩增附生。由地方官申送者。由該學政驗照錄科送考。並將被遺之人。知照國子監。其由吏部咨送在監錄科被遺者。亦知照學政備查。○又覆准。外省教職選缺後。因病尚

未赴任。在吏部呈請開缺者。准應順天鄉試。○
二十八年議准。捐輸各案內捐納職官。作為貢
生監生人員。如有願應鄉試者。應令補領部監
執照。以便錄科時覈驗。惟明年即遇鄉試。各省
遠近不一。予限一年。如在一年內。遇學政錄科
時。即將官照呈驗。如一年限外。即應呈驗部監
執照。以歸畫一。○二十九年覆准。刑部司獄係
專司禁獄之員。責任較重。不准鄉試。○咸豐元
年覆准。滿洲文生員。已補放防禦者。不准鄉試。
○二年覆准。考取膳錄。在吏部投供。與在館膳

錄有閒。由吏部送監錄科。○四年

諭。何彤雲奏請推廣捐輸條款等語。京官五六品實缺人員。捐免離任。准其赴試一節。曾經部議奏駁。何得再行瀆請。近因軍餉浩繁。所有捐例。業已遞加推廣。至考試為取士大典。豈容擅改成例。致開徼幸之門。所奏著不准行。○九年覆准。保舉分發知府。尚未赴

部引

見領咨到省者。一體應試。○十一年

諭。各省駐防八旗。向來本有考取文舉人生員之例。自道光年開改為繙譯。將舊例停止。現在繙譯考試。各

省遵行已歷有年。嗣後著於駐防繙譯科甲外。仍復駐防考取文舉人生員之例。均准其鄉會試。與繙譯一體錄用。以廣登進。○同治三年議准。拔貢

朝考以知縣用。到省後未經委署。告假回籍者。遇鄉試時。比照舉人大批知縣給咨會試之例。由原籍督撫聲明並未委署地方字樣。咨送吏部。割監錄科。仍不得臨時告假。徑行來京取結。應試。其有先經告假在籍。願應本省鄉試者。由本省督撫確切查明。實係未經委署地方。准其一體考試。仍不得因鄉試屆期。始行告假回籍。至

由拔貢保舉捐納分發各員。均不得援以為例。
○六年覆准。外省生員保舉訓導。非貢監出身者。不准應順天鄉試。○又覆准。選補佐貳。尚未到任。丁憂開缺。服滿後改捐主事分部者。照候補候選小京官例一體鄉試。○又覆准。廩生分部學習筆帖式。照貢監筆帖式之例。送監錄科。
○九年覆准。承襲世職及廕監生。均准鄉試。如係生員兼襲世職者。先有教官書斗識認。仍照廩增附應試之例辦理。卷冊內註明某學某生兼襲某項世職字樣。其捐納貢監兼襲世職者。

有部監執照可憑。仍照貢監應試之例辦理。卷冊內填寫某縣某生兼襲各世職字樣。至雲騎尉恩騎尉改作文生員應試者。以准襲印文為憑。並取具里鄰親族等甘結。呈該廳州縣驗明。傳同禮房書吏當堂認准。出文送考。其卷冊內填明某縣某項世職改為文武生員字樣。廕生有執照可驗。如尚未領執照。即以准廕印文為憑。亦取族鄰甘結。呈縣查驗。傳同禮房書吏認准送考。其卷冊填寫廕生字樣。仍於臨場時責成該廳州縣禮房書吏來省臨場識認。以杜弊。

混。○又覆准。實缺小京官。議敘主事。籤分候補者。仍行錄科。○十二年覆准。優貢

朝考。以知縣用。分發到省者。不得徑行起咨來京應試。○又覆准。外省駐防隨任讀書。由任所齎咨來京鄉試者。即由京旗送考。○十三年議准。順天鄉試人數加增。添建號舍三千間。尚屬不敷。嗣後錄送科舉。務宜通盤覈算。嚴加考試。精通三場者。方准鄉試。其學殖荒淺之人。不得濫行錄送。○又議准。順天鄉試。於八月初一日奏定人數。學臣監臣。即不得再行錄送。俾士子投

卷依限告竣。而造冊印卷。皆可詳細覈對。以昭慎重。○又議准。各省貢監由國子監錄科者。其送考之期。仍照向例以七月二十七日為止。過期概不補送。○又覆准。捐輸加廣中額。既係永遠定例。嗣後照原定中額。一併覈算科舉。○光緒元年覆准。廣州駐防。現充同文館學生。既蒙獎勵。作為繙譯生員。留京肄業。准其就近應北闈鄉試。○八年

諭給事中鄧承脩奏條陳科場事宜。請飭慎覈錄科等語。鄉試錄科送考。例有定額。近年順天鄉試錄

送太濫。以致號舍不敷。嗣後著國子監及順天學政嚴行考覈。分別棄取。毋得稍涉冒濫。○又覆准。生員保舉孝廉方正。以佐雜用者。由吏部文送國子監錄科應試。○又奏准。各直省生員。曾經保舉孝廉方正。頂戴榮身者。嗣後遇鄉試之年。止應本省鄉試。概不得應順天鄉試。以免紛歧。○九年議准。年老例貢監生。應試錄科。照年老生員例。大學用廩生六名。小學五名。公同具保。其廩額不及五名之學。取具增附生識認甘結。呈由州縣官驗明執照。覈其年貌相符。加結申

送考試。並由監臣學臣於考到錄科時。查驗執照年貌無訛。始准收考。如有頂冒情弊。除將頂冒暨借給執照之人治罪外。並將出結之生員。照認保廩生濫保槍替例。斥革。知情受賄者。分別治罪。不行詳查之起送地方官暨收考官。均交部議處。○又議准。各省鄉試。奏請年老例貢監

恩賞時。即將該貢監原捐各照送部查覈。俟奏准後。該貢監等既經

恩賞舉人副榜。原捐執照。即由部分送戶部國子監

查銷。其不係年老之貢監中式者。原捐各照。亦於填寫親供時。將執照呈繳學政。送部查銷。並由各該督撫通飭地方官徧行曉諭。凡已故捐納貢監原捐執照。均令隨時繳銷。以杜蒙混。○十二年奏准。嗣後順天及各省鄉試。凡貢監生員丁憂於七月下旬服滿者。如在錄科截止以前。一體考試。逾期不得補行錄送。其八旗生監鄉試。由各該旗查明於兵部考試騎射以前服滿者。造冊報部送考。逾期亦不准補送。○又奏准。順天奉天府經歷一項。無論何項出身。曾否

委署地方各缺。均照各省佐貳官例。不准應試。
○又奏准。降調人員。除舞文翫法。迹涉贓私。或
弊在科場。或事關倫紀。無論曾否補過實缺。概
不准其應試外。若事屬因公。失於覺察。或被人
波累。或他案牽連。情有可原。而級無可抵者。如
呈請應試。由部錄敘案由。請

旨定奪。○又奏准。貢監出身之五六品實缺京官。無
論改捐候選。及告假離任各員。均不准其應試。
惟丁憂人員。如起復後尚未補缺。仍准應試。○
又奏准。由貢生捐教職者。除實缺及現在署缺

各員仍照舊止准應本省鄉試外。其候補候選及曾經署缺並非現在署任各員。無論是否捐納分發。俱准應南北鄉試。照正途貢監例錄科。○又奏准分發試用人員。除未經委署捐升京職一項。仍照舊應試外。其捐升外任候選。並降調後。無論改捐京外各職。概不得以未經委署為辭。援候補候選之例。請應鄉會試。○又奏准親老告近在部候選人員。如籤掣遠省實缺扣除者。無論近省銓選已否到班。均照京員遇缺頂補例。不准應試。○十三年議准。各省學臣於

歲科試時。生監中有報考算學者。除正場仍試以四書經文詩策外。其考試經古場內。另出算學題目。果能通曉算法。即將原卷咨送總理各國事務衙門覆勘註冊。俟鄉試之年。按冊咨取赴總理各國事務衙門試。以格物測算及機器製造。水陸軍法。船礮水雷。或公法條約。各國史事諸題。擇其清通者。錄送順天鄉試。

欽定大清會典事例卷三百三十九

禮部

貢舉 起送會試

起送會試。○順治八年題准。新舊舉人會試。直隸限十二月起送。山東。山西。河南。陝西。限十一月起送。江南。浙江。江西。湖廣。限十月起送。福建。廣東。廣西。四川等省。限九月起送。如司府稽延違限。聽禮部查叅。○又定。舉人會試。由布政使給予盤費。安徽。二十兩。江西。湖北。皆十七兩。福建。十五兩。湖南。十四兩。廣西。十二兩。今十二兩七錢八分

有。浙江。河南。皆十兩。山西。七兩。陝西。六兩。甘肅。

江蘇。皆五兩。今甘肅五兩。五錢。二分。有奇。直隸。四川。皆四兩。

今四川四兩。六錢一分。山東。一兩。廣東。二十兩。今二十兩。一錢七分。

惟瓊州府。增十兩。每名三十兩。於領咨日給發。

謹案戶部例。載直隸。奉天。山東。山西。河南。江蘇。安徽。福建。湖北。湖南。陝西。等省。今係按名數勻派。

○又定雲南貴州舉人。給予盤費。每名三兩。

仍給驛馬。謹案兵部例。載給雲貴會試舉人。大。牌。每名馬一匹。不支廩糧。同日准其

換給。若已中進士。同。籍者。亦准給大牌。○康熙三年題准。舉人考

授內閣中書。及現任內閣中書者。皆准會試。○

五年題准。嗣後會試。直隸舉人。責成順天等府。

起送各省舉人。責成布政使司起送。其欠糧緣
事黜革及現在議處未結。與罰科丁憂患病等
項。確查不送。○又題准。會試舉人。各直省先於
年前詳覈造冊。限十一月內送部。仍逐名給文。
限會試年正月初十日內到部投遞。其過期投
文者不准收試。如地方官不照定限送部。及遞
誤給文者。禮部指名題參。○七年題准。舉人就
教者仍應會試。○九年議准。會試投文。展期於
二月初一日。○雍正七年

諭。凡由舉人考試補用筆帖式者。俱准其與舉人一體

會試。○八年

諭各省會試舉人。向例給予盤費銀兩。所以體恤士子。助其資斧之需。聞得各州縣舉人。俱赴布政使衙門領取。道途跋涉。守候需時。吏胥又多勒索扣剋之弊。嗣後著從本州縣衙門照數給領。該州縣取各舉人領狀。申詳布政使。於奏銷冊內報部查覈。庶吏胥無侵剋之事。而士子亦免跋涉守候之苦矣。若州縣稍有扣剋需索。而督撫失於覺察者。經朕訪聞。將督撫一併議處。○九年覆准。會試舉人盤費銀兩。原係三年一領。未便久存州縣。致啟侵挪。應將各屬所

徵按年解交司庫。至會試年分。令各州縣於雜項銀內。先行支給。布政使將所解之銀。撥還原項。惟是會試盤費。係各州縣額編錢糧。若以本州縣之額徵。即支給本州縣之舉子。其中多寡不等。應令各屬將應試舉子。豫行報明布政使。該布政使將各屬所徵盤費。合計通省人數。均勻派定。飭行各州縣按數支給。庶屬均平。至應給銀兩。如有扣剋需索等弊。該督撫即行查叅。○乾隆元年覆准。凡遇會試之年。該州縣於舉子具呈到日。即出具文結。申詳布政使覈明。勒

限給咨。不許胥吏任意稽延。亦不得藉端駁詰。儻州縣官不即詳請。布政使不即給咨。該督撫查出。指名叅處。○五年覆准。會試舉人。支領盤費銀兩。有任意逗遛及中途潛歸者。照例追還銀兩。其有患病丁憂者。取具該地方官印結。詳明報部。或已經到京。而患病丁憂者。取具同鄉官印結報部。均免追繳。○又覆准。己未科以前。凡領過盤費。而人文不到。及文到人不到之舉人。令該地方官查明。從前實係中途丁憂患病。未經呈部者。准其申報督撫咨部。即有實未到

京而本身物故。及委係家貧力不能完者。亦准據實報部。移咨戶部一體豁免。其並無事故。力能完繳者。仍照例行追。以防冒濫。○七年覆准。舉子會試。例由州縣起文申府。由藩司給咨赴部。有轉發州縣付本人者。有親身赴司候領者。各省原不畫一。自甲子年為始。於鄉試後。藩司咨文。限一月內發各州縣。交本人自齋投部。武舉均照此例。○二十一年議准。舉人於會試之年。凡有丁憂起復事故者。照貢監丁憂起復之例。專咨報部。○二十四年議准。舉人選授教職。

俸滿來京引

見願會試者。准其留京會試。○又議准。凡會試不到舉人。應追原領盤費銀兩。地方官勒限半年。追繳完項。如逾限不清。承追官照雜項錢糧議處。○二十八年議准。舉人已任知縣。因不勝民牧。改補教職。或八旗舉人已任知縣。亦因不勝民牧。改補筆帖式者。俱准會試。如題叅降調。以筆帖式補用之員。不得援照此例。○二十九年議准。舉人會試。照例申送藩司。覈明詳院請咨。發司轉給。其應造各冊。一體查照送院咨部。並嚴

飭上下衙門各照題定起送之限。隨到隨給。儻有吏胥需索留難。以致遲誤。查出叅處。○又覆准順天府屬舉人。由該府尹給文會試。其直隸總督所屬地方。由州縣徑詳布政使覈明。詳院請咨。再由院發司轉給。○四十年

諭據驗看會試舉人騎射王大臣等奏稱。應行考試者一百二十五人。內報近視眼者七十三人。已揀令二十人照常騎射外。其餘實屬不能之五十三人。俱未令其騎射等語。騎射係旗人根本。即讀書人亦不可不學。今考試一百二十餘人。報近視眼者竟有七十

餘人之多。明係捏報。希圖規避。滿洲習氣。竟至若此。實堪憤恨。若以近視眼不能騎射。哈達哈即係近視眼。此衆人之所共知。伊何以隨朕畋獵殺牲乎。此輩因不能騎射。遂藉口以圖微幸。甚屬不堪。滿洲臣僕甚衆。豈必賴此數人。況此等無用人內。將來亦斷不能得人。所有不能騎射之五十三人。俱著停其考試。豐訥亨等並未奏及。惟請嗣後交該旗大臣詳查報部。派出大臣驗明後。方准免其騎射。所奏殊屬姑息。嗣後考試人內。若有似此不能騎射者。俱著停其考試。著為例。再此輩明係捏報。該旗大臣等所司何事。

因何出結送部。著軍機大臣查明奏聞。○四十二年
諭。向來雲南貴州舉人。進京會試。一路賞給驛馬。所以
體恤遠方寒暖者。至優極渥。本年陝西鄉試中式第
二名。係新設迪化州阜康縣人。可見關外人文漸盛。
殊屬可嘉。第念該處進京道里較雲貴等省更遠。即
每科新疆士子。赴西安鄉試。路亦不近。而新疆車馬
等項。雇覓維艱。殊堪軫念。嗣後嘉峪關以外士子。赴
西安鄉試。及進京會試。並著加恩照雲貴之例。一體
賞給驛馬。以示優恤。邊陲寒士之至意。○四十三年
諭。軍機大臣會同禮部議。駁曹學閔條奏會試舉人徑

由州縣出具印結。親齎投部一摺。已依議行矣。舉人會試。由州縣申詳院司。給咨送部。體制本應如此。況給咨時。書吏並不見面。何從向其勒索。設果有不法書吏。該管上司。自無難據實查究。於士子並無所累。且其事遵行已久。無甚關繫。何必輕議更張。○四十九年議准。教諭降一級調用。應以從八品之布政使。照磨鹽運司知事。府州縣訓導。補用。照舉人在京候補候選之例。准其會試。○五十二年定。內閣中書。降二級調用。應以從八品國子監典簿補用。照舉人在京候補候選之例。准其會

試。○五十三年

諭。據徐嗣曾奏已革主事仍留舉人。不准應試之周嘉猷。向在幕中辦事。一切軍務。皆伊經理。頗知急公。有志向上等語。周嘉猷著加恩准其一體會試。以示鼓勵。○五十五年定。內閣中書升任主事。主事仍降為中書。由舉人歷任知縣。大計卓異。推升小京官者。准其會試。○五十七年覆准。舉人大挑分發知縣。降一級調用。應以從七品之布政司都事等官補用。照舉人在京候補候選之例。准其會試。○六十年定。年老患病勒休之教職。不准會

試。○嘉慶六年覆准舉人出身知縣。緣事革職。降捐教諭候選。准其會試。○又覆准舉人分發知縣。捐升主事。准其會試。○八年

諭。禮部呈進科場條例。於起送會試條下。聲明教官降雜職者。其未經得缺以前。請改照候補候選人員之例。由舉人出身者。俱准其會試。由貢生出身者。俱准其鄉試。增入新例等語。殊屬非是。教職一項。降調佐雜等官。向不准其鄉會試。原因其緣事錮級。已挂吏議。與在部候選候補人員。例得應試者。迥不相同。況節年各省教官降為雜職。遇有呈請應試者。均經批

駁有案。若因其由舉貢出身降調。輒請准其應試。顯與定例不符。禮部堂官於條例內率行增入。未免心存邀譽。俱著傳旨申飭。此後教官降為雜職人員。不准應試。仍著照舊例行。○又奏准。嗣後中書通政司經歷等官。由知縣推升。或由六部司員降補。或由現任知縣奏改教職。或因初選引

見奉

旨以教職改用者。俱不准其會試。其州縣牧令緣事降為丞倅等官者。亦一體不准會試。惟分發試用。未補實缺。而捐升京職歸部銓選者。與在部

候選人員。事同一體。仍准會試。○十年議覆。舉人由國子監助教降調候補學錄。非同教官降為雜職者可比。准其會試。○又覆准。舉人由教諭降調捐復者。准其會試。○十二年

諭阿林保等奏新選江西長甯縣知縣鄭兼才。懇請仍改教職等語。鄭兼才前在臺灣縣教諭任內。值蔡逆滋擾。率領生監守禦出力。加恩以應升之缺儘先升用。由部籤升知縣。該員有志觀光。情願仍改教職。以圖會試。著照所請。鄭兼才准其註銷所選長甯縣知縣。加恩仍以教職即選。俾得一體會試。○十四年覆

准舉人現任教職押送膳錄來京事屬因公。若再候起咨已誤試期。准其取結會試。○十六年奏准舉人在本省填寫親供來京會試始知親供尚未到部。取具同鄉京官切實印結赴部。准其會試。○十八年議准大挑知縣自行呈明改教並告假回籍實未委署各員遇會試時由原籍督撫給咨赴京咨內聲敘並未委署地方字樣准其一體入場仍不得臨時告假來京取結應試。○十九年覆准坐補倉監督者仍照小京官例會試。○二十二年

諭御史謝崧奏請速發會試盤費一摺。直省舉人起送會試。給予水脚銀兩。原係國家嘉惠士林優恤寒畯之恩。自應早為給發。乃有延至次年。俟該舉子由京回籍。始令補領者。殊乖立法本意。嗣後此項銀兩。著各該藩司按照定例。於起送會試時。飭令該州縣全數給發。其本科未經給領者。俱查明補給。如有書吏剋扣。稍情弊。查出嚴懲。以均實惠而杜侵欺。○二十三年覆准。駐防舉人起送會試。照直省舉人一體給予盤費。○又奏准。嗣後大興宛平二縣舉人。由順天府府尹給文會試。如有取結納卷

者。概行駁回。○二十四年

諭禮部奏參教職違例取結會試一摺。甘肅階州訓導蔣萬柏。以現任教職。並不遵照定例。向該省督撫領咨會試。輒自任所起程來京。取具同鄉京官印結。赴部投考。實屬違例。蔣萬柏著即飭令回省。同濫行出結之刑部主事同功元。一併交部議處。該州知州近在同城。漫無覺察。並著該督查明參處。○又覆准。順天大宛各舉人。無論現任候選候補人員。均赴順天府起文會試。凡各衙門咨送者。概行不准。○又覆准。領催前鋒。並非實授武職。其由文舉

人挑取者。准其會試。○又覆准。委署教職卸事。後因原籍路隔千里。請咨恐誤考期。准其取結會試。○道光元年

諭苗舉人有赴京會試者。即照本省舉人之例。給予公車銀兩。仍嚴禁書吏需索。俾令踴躍觀光。○又覆准。駐防舉人。來京報考中書。因會試期近。未能回省領咨。取具本佐領圖片呈請留京會試者。照邊省教官留京會試之例。准其會試。○又覆准。大挑知縣。因中途患病。來京就醫。在吏部呈請起病。並請會試。據吏部咨明該員尚未到省者。

准其會試。○二年

諭孟住等奏請借項生息資助旗籍舉人會試一摺。廣東距京遙遠。駐防八旗文武舉人進京會試。資斧維艱。加恩著照所請。准其於扣存兵丁馬價存貯藩庫銀內。賞借一萬兩。發商生息。遇會試之年。每名除例賞水腳銀二十兩零外。加賞銀三十兩。賞贖餘銀。俟積有成數。陸續歸還原款。年終報部覈銷。○又覆准新選教職。在京適逢會試。准其留京取結會試。

○三年

諭薩象阿奏請撥項生息賞給旗籍舉人會試等語。福

建距京遙遠。駐防八旗滿洲漢軍舉人。進京會試。資
斧維艱。加恩著照所請。准其於閩海關庫貯平餘罰
料截贖三項閒款存銀內。撥銀一萬兩。發商一分生
息。遇會試之年。每名除照例由藩司給水腳銀三十
餘兩外。加賞銀四十兩。年終造冊報部覈銷。○五年
覆准。學正降一級調用。既經選授訓導。即係現
任教職。與緣事降為雜職者不同。准其會試。○
十二年覆准。舉人承襲五經博士。係八品職官。
與現任中書等官。事同一例。由該督撫給咨會
試。○十五年覆准。舉人大挑知縣。遵照定例告

假回籍。由本籍起咨會試。不准由該試用地方給咨會試。○又覆准。候選知縣。現在揀發差遣委用。不准會試。○十六年

諭前因正白旗滿洲進士慶康形同殘廢。步履甚艱。當降旨著兵部查明據實具奏。並著監射王大臣及咨送考試之都統等明白回奏。茲據兵部及該旗都統監射王大臣等奏。中樞政考內載。凡遇考試進士舉人生員人等。其有手拐者免考。馬步箭等語。並准兵部呈送大清會典。暨中樞政考。經軍機大臣開單進呈。朕詳加披閱。會典內載係手疾字樣。中樞政考內

載係手拐字樣。著兵部遵照會典改正。以歸畫一。該
監射王大臣及咨送考試之都統等。於慶康會試。雖
屬遵例。免其考試馬步箭。但慶康形同殘廢。尚不止
於手疾。該都統等不行駁斥。率准送考。自係瞻徇情
面。不肯認真。該監射王大臣按照原冊。不復行查。依
樣葫蘆。不能實心任事。於此可見。睿親王仁壽綿悃
及正白旗滿洲都統文孚等。俱著交各該衙門嚴加
議處。慶康著仍照前旨歸班銓選。○又奏准。輕車都
尉。由文舉人兼襲。照文生員兼襲應試之例。一
體會試。○又覆准。滿洲舉人曾任知縣。因丁憂

回旗奉

旨內用。掣分筆帖式。不准會試。○十七年議准。大挑一等奉

旨。改教人員一體會試。○十八年

諭前據刑部奏候補主事慶霖呈請將行走差使開缺回旗會試。當交吏部察議具奏。茲據查明向例遇缺頂補之員。概不准呈請註銷。慶霖現係頂補主事。業經見缺。所有該員呈請開缺會試之處。著不准行。嗣後頂補人員。均不准於見缺後。呈請開除差使。回旗會試。以杜規避。○二十九年奏准奉

旨毋庸裁取之舉人。既經給予京銜。不准會試。○三十年覆准。舉人選授外任。未經到省。旋即丁憂。現在服闋候選。准其會試。○又奏准。滿洲世管佐領文舉人。有掌管圖記之責。不准會試。○咸豐二年奏准。舉人選授知縣。未經領憑赴任。報捐知州。在京候選。准其會試。○六年覆准。舉人由內閣中書捐免試。俸。選授同知。尚未領憑。改捐員外郎。分部學習。准其會試。○又覆准。舉人選補鹽大使。領憑後告假回籍修墓。呈請改教。選授教職。准其會試。○同治三年議准。拔貢

朝考以知縣用。到省後未經委署。告假回籍。照舉人大挑知縣給咨會試之例。由原籍督撫咨送鄉試。中式舉人後。尚未委署補缺。告假在籍。亦照大挑知縣辦理。由本籍督撫給咨會試。○十年

諭禮部奏福建巡撫咨稱。南安縣舉人王玉書。呈由本籍請咨會試。府縣轉詳未到。藩司詳請先行給咨。再飭取供結補行咨部。經該部查明王玉書已於咸豐九年中式進士。籤分刑部主事。當將試卷扣除。傳集出具保結舉人洪榮等詢問。均供王玉書早經中式。

進士。在籍病故。該舉人等並未出結。委係被人冒捏。並取具同鄉京官保結。該舉人等實不知情。復據該舉人等呈稱。尚有黃梧陽等四名身故多年。鄭超英等二人並未到京。均被人冒報。恐仍有捏結情弊。照呈按名傳訊。均未到部等語。案關冒充舉人。蒙混請咨。亟應澈底根究。著英桂王凱泰確切查明。照例懲辦。不得含糊了事。至舉人黃梧陽等何時身故。未據咨部。鄭超英等是否親身到京。著一併確切查明。嚴行究辦。以杜弊端。福建省既有此等情弊。他省恐亦在所不免。並著各直省督撫認真查察。毋任姦徒作

偽。又

諭前因禮部查出福建舉人王玉書及黃梧陽等七名
冒名請咨。奏請飭查。當經降旨諭令查明究辦。茲復
據文煜等奏。此次會試舉人。就省取結詳咨者計五
十八名。除胡夢得等十三名。續據府縣加結補送外。
恐如王玉書等之冒名弊混者。尚不乏人。現已覆查
究辦。並請交部議處等語。著文煜王凱泰確切查明。
嚴行懲辦。以儆作偽而肅功令。福建布政使潘蔚。未
能詳查。遽行詳請給咨。殊屬疏忽。著交部議處。福建
巡撫王凱泰。當時未能查出。著交部察議。○光緒三

年覆准。宗室職官。由舉人出身者。因案降調。無缺可補。照例革任。查明該員。如果於降調外。尚存有品級。與革職人員不同。准其一體會試。○十二年奏准。會試年分。凡舉人丁憂。於三月初五日以前服滿者。准其就近取具同鄉京官印結。納卷入場。若扣至初五日服滿。即不准其會試。其八旗會試。由各該旗查明。於兵部考試騎射以前服滿者。造冊報部送考。逾期亦不准補送。